



## **PRIMA SEDUTA URDINARIA PER U 2017**

**U 23 è u 24 di FERRAGHJU**

**N° 2017/O1/011**

### **DUMANDA À BOCCA SPOSTA DA TOMASI PETRU ANTONE DI U GRUPPU « CORSICA LIBERA »**

#### **UGETTU : Servizi publicu - impiecu**

O sgiò Presidente,

U livellu di puvertà altissimu, i scarti di ricchezza, e difficoltà à intraprende ch'ella cunnosce a Corsica ùn si ponu adimette in un paese cusì riccu di potenzialità. A lotta contru à u disimpiecu, a prumuzione d'un sviluppu economicu ammastratu, ghjustu è solidariu sò dunque in core à un impegnu permanente di a nostra magiurità.

Tante iniziative sò digià in anda : frà altru, a nostra Assemblea hà vutatu di dicembre u schema di sviluppu economicu « SRDE2I » cuncipitu da l'ADEC è u Presidente di l'Assemblea di Corsica porta una cuncertazione nantu à un statutu fiscale è suciale o una Cartula per l'impiecu lucale.

Di marzu 2016, una muzione di u nostru gruppu era stata vutata largamente da l'Assemblea per dumandà u trasferimentu à a CTC di e cumpetenze in leia cù u serviziu publicu di l'impiecu. Per esse più efficace di pettu à u disimpiecu, aviamu pinsatu chì st'arnese duvia esse ammastratu à u più vicinu di e realtà sociueconomiche.

Aspittendu di neguzià u trasferimentu integrale, a lege NOTRe permette digià di delegà una parte di sta cumpetenza. A Cullettività Territoriale di Corsica è sei regione francese l'anu dumandata.

Eppuru, à a fine di l'annu scorsu, u governu avia datu istruzzione per rimette in causa sta pussibilità. Aviate tandu scrittu à a Ministra in carica di ste quistione per prutestà davanti à stu rinculu.

O sgiò Presidente, vi prichemu di facci sapè s'elle ci sò state avanzate cù Parigi nantu à stu cartulare impurtante.

À ringraziavvi.

